



FAMA pantau harga sayuran di Cameron Highlands

Oleh **Mohd Rafi Mamat** - Mac 28, 2023 @ 10:19am
bhnews@bh.com.my



Harga tomato Cameron Highlands tidak menentu dan kini mencapai RM5.50 sekilogram.-
Foto NSTP/Mohd Rafi Mamat

KUANTAN: Lembaga Pemasaran Pertanian Persekutuan (FAMA) mendapati, harga sayur tanah tinggi Cameron Highlands kini tidak menentu disebabkan faktor pengeluaran dan permintaan semasa.

Pengarah FAMA Pahang, Saiful Sadri, berkata terdapat kira-kira 23 jenis sayuran jenis daun, buah dan ubi

keluaran pekebun di Cameron Highlands dengan pasaran tempatan dan Singapura.

Katanya, terdapat beberapa sayuran jenis buah kini dijual pada harga ladang melebihi RM5 sekilogram, antaranya tomato, lada benggala merah dan hijau, cili merah minyak, terung panjang, tomato serta lik.

Katanya, harga tomato pernah mencecah lebih RM10 sekilogram pada awal tahun ini ketika Tahun Baharu Cina, berikutan pengeluaran yang berkurangan sedangkan permintaan begitu tinggi hingga tidak mencukupi.

"Setiap dua hari sekali, kita merekodkan harga 23 sayuran keluaran pekebun di Cameron Highlands, harga ladang akan mempengaruhi harga jualan runcit.

"Harga ladang kini lebih banyak dipengaruhi oleh pekebun kerana mereka sebagai pengeluar bagaimanapun, mereka tetap akur dengan peraturan yang ditetapkan kerajaan," katanya, dihubungi di sini hari ini.

Beliau menambah, cuaca yang tidak menentu turut mempengaruhi harga sayuran tanah tinggi dan

tanah rendah. Bagaimanapun, bekalan sayuran di negeri ini masih mencukupi dan harganya tidak terlalu tinggi.

Saiful berkata, pihaknya sentiasa memberi galakan kepada masyarakat supaya terbabit dalam sektor pertanian, pelbagai kemudahan disediakan kerajaan. Bagi peserta ladang kontrak FAMA mereka berpeluang mendapat pelbagai kemudahan.

"Kita tidak ingin melihat pengguna terus terbebani dengan harga tidak menentu sayuran di negeri ini, justeru kawalan harga dilakukan oleh pihak berkuasa.

"Bagi mendapatkan sayuran pada harga lebih rendah dan segar, pengguna boleh ke pasar tani dan program Jualan Terus Dari Ladang (JTDL) anjuran FAMA," katanya.